

in Italiam mittit. Nuptiis ingenti splendore, ac regia magnificentia Florentiæ celebratis, Nicolaus Molinus, Reipublicæ legatus, interfuit; ejusque nomine Reginæ gratulatur, Ferdinandique Magni Ducis filio sacri fontis unda abluendo adstitit. Aldobrandinus Cardinalis, qui tum Florentia transibat, Mariam atque Henricum, Magno Regis scutifero procuratore, statis de more Ecclesiæ cæremoniis matrimonio junxit. Connubium, per literas Villieriumque oratorem Principe invitato, Rex Patribus significavit. Senatus consulto gratiæ actæ; bini oratores lecti Leonardus Donatus, Joannes Delphinus, Marcii Procuratores. Atque ut majus nullum in potentissimum invictumque Regem ab Republica benevolentiae & observantiæ pignus exquiri posset, majoribus comitiis in patriciorum numerum præclaro ac peregregio ad posteritatis memoriam decreto est adlectus. Nam cum per intimos ac familiares suos a Francisco Contareno, ordinario, Franciscoque Vendrameno, extra ordinem ob pacem ictam legato, qui tunc Luteriæ aderat, petiisset, an Antonius pater, Cantabrum Rex, inter Venetos patricos censeretur, ejusque rei in publicis monumentis notæ extarent, ac, ni essent, nobilitatis privilegium apud se libenter habiturum significasset; perquisitis advocatorii magistratus tabulis, cum notæ non invenirentur, a Consiliariis, ac Quadragesimavirum magistris majoribus comitiis latum, ut Henricus quartus, Galliæ ac Navarræ Rex, cum filiis posterisque suis patriciæ nobilitati adscriberetur. Qua in re, quod nunquam alias accidisse memorabatur, contigit, ut ex mille quadringentis novem ac triginta suffragiis, duo tantum lex adversa tulerit, quæ casu in viridem urnam cecidisse credendum est. Annæ exitus insignis maris infueto æstu fuit, quod ingenti adeo impetu ac furore intumuit, ut multis in locis, litoribus disjectis ac divulsis, mare in æstuaria influxerit, assuetosque terminos transilierit, gravioris jacturæ periculo, ni tempestas ventique vis cito concidisset. Ut quam celerrime litora sarcirentur, Senatus decrevit: missi Senatores duodecim, qui loca inspicerent, quave ratione instaurari, firmioraque reddi possent, decernerent. Perficiendi munus aquarum magistratui mandatum.

1600

Nicolaus
Molinus in
Hetruriam orator

Leonardus
Donatus &
Joannes
Delphinus,
in Galliam
oratores.

Henricus
Rex inter
Venetos pa-
tricos, a Ve-
netis recen-
sus.

Finis Libri Decimi quinti.

S 2

EPI-